

公是集卷六

宋

劉

敞

撰

五言古詩

今古路

8

出門道路多縱橫不可測我今欲遠行須問曾行客徐
 徐逢路人借問青松側客曰今何往答之遊京國客乃
 指要路而言行有益古路難難大道不如今路直但行今
 人路猶如假羽翼彼客別我去獨自躊躇立為見今古
 路信乃無差忒若今路足輪蹄古路多荆棘欲行今人路

恐背古人迹欲行古人路今人笑迂僻又擬不出門奈
何飢寒逼哀哀此時路悠悠蒼天色不避今人嫌路須
行古陌古陌雖然遠且保無蹶失勉哉自勉哉前去難
云適不獲見楊朱萬古凝愁魄

曉至池上

宿雨墜高葉薄雲麗朝陽園林澹澹秋庭戶蕭蕭涼水
淺魚拂鬱荷深鷺低島幽懷欣自得佳賞契所望忽恐
羣動作深林沸蜩蟬

晚涼

落日蔽崑崙微風起閭闔蟲聲語悽惻樹影翻離合蚤
露結明皦圓蟾瑩塵匣浩歌始自放喟此區中狹

金山東崖北望海門

憑高仍一望北固何崔嵬地形束吳越江險通邛峽英
雄旣已矣壯觀空在哉寂寥寒潮上孤帆當檻來

屏上兩賢二首

謝公樂山水不以官爵間天機有所賦世俗從爾訕上
躡巉巖峯下弄清泠澗吾生慕如此敢避刺疎慢寧爲
途中龜勿作蒿下鷄謝靈運

公是集 卷二 二
人在誰不如妄爲世所束與來當自往與盡斯自復大
雪暗溪路新晴月微燭去非之子慕返豈斯人辱優游
便所適偃蹇媚幽獨王子猷

贈梅聖俞

耳聞梅聖俞及此將十載洛下聚英豪文華富如海聖俞
昔與錢丞相歐陽公尹洙王復會洛中皆名士聲名動冠劍久合參朝案何意
幕中客新違江上宰聖俞以諸侯從事知建德縣罷歸京師材高用雖晚
大器終有在三公識者多薦拔可立待棲棲九衢裏塵
土增厭殆相逢恨知晚乍似去貧餒鄰居幸見過沃此

留礪魄

登禪智寺上方贈同遊諸公

重岡抱城起清川帶野回舊都遷陵谷遺寺空池臺脩
竹入晡藹荒磎轉崔嵬鳴禽畏人起故老驚客來置酒
感興廢浩歌寄歡哀伊昔游此人于今安在哉谷深春
先覺地爽景後顏造適假一笑願君盡餘盃

楊白花

飛飛楊白花隨風渡江水江水來不極楊花去無已鴉
啼淺深樹雪落千萬里春風傷人心慙慙復如此

涵虛閣玩立猿孔雀

清池明夕景高樹含涼風
巴猿戲前檻越鳥安深籠
悲吟激清漲文繡揮蒙茸
弱喪不自非全生或爲容
曠然感真樂達哉濠梁翁

雨霽同聖民登西北樓

雨餘暑氣滅日出浮雲開
高樓極遠目百里無纖埃
山形西北驚江勢東南來
舊都尚能記壯觀多可哀
微風激清嘯浩霧侵寒杯
亦知非吾土聊復樂徘徊

秋興三首

微風起閭闔秋意日已滋
陰蟲羣悲鳴草木同變衰
天道雖茫昧平分爲四時
功成自當去搖落何獨悲
魏牟貴公子沈沒功名間
一浮江湖水慘戚顏朱顏
魯連揖萬乘蹈海如忘還
棄世脫傲屣風流安可攀
耿耿秋漢輝中夜西南流
牛女永相望婉孌悲素秋
安知乘桴翁徑出海外遊
天路或幽險神仙非所求

留城子房廟

大風起豐沛海水羣飛揚
逐鹿未有歸飛熊猶道旁
一見契千載立談開八荒
蛟龍不可羈鴻鵠得新翔
昔爲

公集 卷六
四
黃石師智策無與雙晚蹈赤松賞功名忽如忘由來神
仙流理與天地長陵谷自有遷若人豈復亡我行覽遺
蹟城邑空蒼蒼感古追遠遊白雲杳無鄉

同介甫和聖俞贈狄梁公裔孫

陳平智有餘周勃勇無敵兩人相提衡終復漢社稷梁
公柱石姿獨立謝羣力匡君多直言薦士有深畫旣扶
將頽運復起未然策事業兼二子浩然雪霜白偏材戒
獨往特達見金德誰謂十世遠風義猶不隔末孫何支
離畝畝有餓色明詔問樂鄉布衣列士籍名垂天壤間
氣使懦夫激聞君商聲歌更若出金石

贈聖從待制

君居御街西我居御街東如何百步間十日不相從君
非園中植落落千丈松我亦湖海人庶幾孤飛鴻俱遊
人世間。俛仰豈不同蕭蕭髮向白袞袞嗟轉蓬仕固不
期達貧亦不諱窮行當一麾去幸識櫻筍翁

早至涼榭觀芙蓉

林深池亦淺日出光晚及粲粲花尚含溥溥露猶浥良
魚潛復躍幽鳥翔又集物情悅如慕心賞浩難戢誰能

贈遠人采采空伫立

同客飲涪州薛使君佚老亭

百尺井底泉激輪作飛流潺湲入庭戶宛轉如奔虬主
人三署郎持節西南州棄之臥故里富貴安足留卻掃
長閉門羸餘非所求客來坐林下樽酒相獻酬未嘗語
朝市餘事良悠悠乃知獨往意不必山林幽衣冠多雋
才繼踵公與侯誰能懸其車五十未白頭嗟嗟賢大夫
此風可鎮浮爲問三輔間何如馬少遊

曲水臺竹間默坐

杖履不能遠逍遙池上林微風起衆響炎日隔繁陰斐
亶激流泉間關語鳴禽放懷在離人寄賞欣會心旣謝
朝市喧亦忘山谷深雖知非吾室猶以開煩襟

永興軍中

涼風響高樹清露墜明河誰復謂見夏夜短已覺秋氣多意豔
膚麗華燭皓齒揚清歌臨觴不作意奈此祭者何

北軒手種竹兩竿近輒有甘露降其上作五言示

諸同舍

秋來手種竹憔悴不成林復此雪霜晚空驚孤直心如

何沾瑞露似欲慰窮陰珠華粲將墜玉色潤還深含春
乍挂苒戴日尙蕭森立澤非人力樵蘇無見侵

舅氏見索新詩

賤子本不學大賢宜見疎奈何手賜教反謂詩起予高
義終炯然內慙良闕如得非魯仲尼不廢狂接輿羈旅
習荆楚荒唐存簡書敢驚和者稀長恐歲已徂雲漢回
天章圖書祕石渠瓊瑤落咳唾寒暑隨吹噓百年渭陽
悲萬古秦風餘嗟我送舅氏終焉非路車

贈蘇頌

犬豕蒙虎革氣能懾羣雌衆人見之美蘇生見之嗤褐
客懷寶玉精神暗塵緇他人望而唾蘇生望而知知之
竟何補位下容貌卑雷同世方尙獨異誠難施嗟子豈
不謬拳拳心不移拜我呼我兄問我謂我師奔蜂負蠶
蠟誰道當其宜憫子空慕古且爲世人非古人亦如此
如此名已垂但當勵行習慰我千里思

雪後城上作

雪後原野曠春生風氣和藹藹林表色輝輝池上波形
閒境逾靜望遠意更多年華適可玩不醉將謂何

寄因甫

君雖委計吏官似宣尼公貧賤更何恨優游聊與同志
懷鷗夷酒乘興松江風此亦隱柱下何用臥隆中

寄聖俞

徘徊帝城裏獨詠有所思故人昔別此秋風今若茲流
水去不已新鷗來有期寄聲可相及一見慰天涯

秋雨

天道去人遠好惡常若違始耕苦炎旱旣穫雨過時
憔悴兩無補飢寒方自茲素飽猶可恃眷言采其薇

寄密令楊彥文再舉學官皆中正

三年不相見相見當何時曩別不謂久後期庸可知周
南滯留地宿昔太史悲春草愁山中王孫髮垂絲懷寶
常若迷獻玉常若疑聞君已屢薦終歲獨差池得鹿在
詭遇亡羊實多歧著書成自樂回首空相思

贈黃子溫別

雙鴻俱異鄉來集清川流鳴聲偶邂逅形影共沈浮一
以風波去一以罟網留去留雖殊趣失侶自懷愁五里
一斂翼十里一回頭有情同覆載誰免顧朋儔南國江

海闊豐年稻梁優力弱霜霰繁無因攜汝遊

同謝十三賦盆池

碧沼含白水動搖明鏡光浮沈見魚樂舒卷聞荷香賞
翫茲有適紛囂因以忘多君江湖意不復疑坳堂

庭前箭竹

冉冉東南美託根那在茲鳳凰不可待歲月方屢移非
復山林意空餘霜霰姿清風有時至獨與幽人期

新置盆池種蓮荷菖蒲養小魚數十頭終日玩之

甚可愛偶作五言詩

采芳未盈手積潤不滿尋游魚亦何樂幽客同此心安
排在所寓相與忘浮沈濟理趣自足孰知慕高深鵬翻
蕩滄海龍起焚山林體妨反多累豈若終蹄涔

送鬱林楊守

鴻鵠懷遠心不畏霜露寒鷄鶩守樊籠朝遊暮來還人
生感意氣朋友死一言況分社稷憂復在君臣間楊侯
一麾守萬里蒼梧山瘴海不可游衆人昔云難升車獨
慷慨卽路無險艱乃知抱忠信可以居夷蠻昔賢尙功
名天子憂南蕃報國恩汲汲勿令歲月遷

送春

莫埽林下花花存春尚在一隨南風散飄忽不可待四
時相乘凌萬物隨變改不如玩三秀忘年蹈雲海

答舅氏時詔不就學官者郡勿舉故見督赴期

飛鳥知深林潛魚樂淵濬升沈久相笑出處各自殉漆
雕不願仕孟子恥獨進軒冕世所榮吾斯未能信辟雍
煥文章王國聚英俊及門足自喜內省媿多吝且將事
畎畝亦以樂堯舜悠悠謝知音當識斯言訥

送張宗道崇班自潁徙秦不樂于行

宛馬來東道燕鴻起南飛適時必有遇去遠不獨迷左
攬繁弱絃右拂青萍輝笑作千里別出門亦依依人生
何新故行道情有違勉率歌清風以慰君永懷

陳元龍

元龍湖海士固有湖海氣自臥百尺樓羣兒仆諸地大
賢資遠到高節邁一世四野爲戶庭九河乃衣帶靈機
有時屈英識豈獨閉蛟龍隨波游恥與魚鼈計擊劔歌
商聲捐書謝俗議功名留當年異代見君意

一月贈深甫

一月三過公此非兒女情詩人感伐木相鳥猶嚶鳴尚
友百世近結交千里輕矧惟生並時況復居同城攜手
未宜少興發從公行開口露肝膽解衿頓塵纓心親愛
自至外物都忘形赤日留中天火雲正崢嶸頗復哀老
子安眠枕羣經

懷歸詩

往昔佩觿日童蒙幸相求中間萬里別倏忽二十秋人
事固契闊歲華易如流聞君尚黃綬失意成白頭奄速
不可期升沈亦難謀寧知及門晚忽辱從政優感舊勞
心腸相從恨淹留寄聲不盡意何以紓離憂

同寄題康州陳生連理木

幽人吉素履佳瑞應精誠蕭蕭衡門下珍木爲之榮連
理出高幹交陰庇前庭顧恐俗未知天方表其閎太邱
往千歲慈孝復騰聲誰言報施遠有若晝夜明世悲上
留田吾慕董生行作詩寄南州且以慰父兄

雪後

雪銷吐膏潤日出春意歸藹藹多時趣融融含夕暉徘徊
中林下髣髴田野期天歡頗不減吏隱亦庶幾歲晏

竟何事濁酒但當揮

和彥文秋興

商飆零枯林疎雨墮中夕覽物愴已驚懷人渺難得明
發聆逸唱願言慰幽寂胡爲抱紆鬱更使動悽惻蜚鴻
識來賓鷹隼知所擊物微有逢辰子壯獨失職高天終
難問淺俗每忌直浮沈豈非智器遠固難識

贈周生

騏驥能千里不能走鼠穴猛虎拘穽中不如狗善齧周
生學干祿強進屢顛蹶時不用周生周生亦不屑行年
過五十頗究知命說未嘗畜妻子名利敢貪竊所憂道
未成欲辨孔與桀人知如此鮮況不厭藜藿與我始相
見便覺抱高節人皆用其巧子獨趨所拙春秋舉逸民
蔽善尙當貶絕誰期大夫賢薦使在班列

嘯亭納涼

翻翻竹梢葉習習蘋末風水氣稍澄澈雲陰反蒙籠解
襟面虛曠幽興欲飛沖得意恥獨善慨然環堵中

過澶州陽橋有感

河水東赴海還從天上回甯知今日波還復前時來岸

柳亦已黃原田正萋萋念我平生歡悵然使心哀

春晚小園

歲華一何速春物俱已老綠柳低映牆臯蘭生滿道郊
居正幽曠野色慰懷抱人鳥不亂羣閉門但卻掃平生
佯狂性更覺高臥好不及古之人吾誰玩芳草

園養始干祿執官復辭親外物與我違幽懷安得伸低徊

無期規二徒自珍秋風卷

層雲鴻雁知何處
我病無期規二徒自珍秋風卷
揚舊抄本
補似失題

公是集卷六

公是集卷七

宋 劉 敞 撰

五言古詩

停雲詩

停停何山雲靄靄在我廬濃光賁草木潤氣下琴書望
望若可親久之翳寒虛坐恐焱風來東西隨所如我道
與世異里閭相見疎嗟雲亦何事低徊能慕予諒以無
心故形影暫相於

華山隱者圖

神仙不可學淺俗如醯雞逍遙二三叟乃獨秦遺黎避
地思遠適名山得幽棲深巖紫芝秀歸路桃花迷稍遠
人世隔遂忘陵谷移至今山中人人往往猶見之吾聞秦
皇帝甚慕真人爲駕石窺蓬萊載車象雲軿沙丘往不
返四海忽若遺安知全真子近在西山垂一千二百年
修身未嘗衰古稱山澤臞非復萬乘期觀君此圖意有
以和天倪

送上元張孟侯著作

避世金馬門歇直承明廬月贏一囊粟調笑騶侏儒忽
憶東南行秋風熟鱸魚聞君已先我扁舟向江湖銅章
垂腰間賜履雙飛鳧千室豈不憂弦歌自爲娛古稱有
人民無事專讀書自顧都城游刺促轅間駒六朝若流
川覽古半有無山中折瑤華千里懷離居

小隱吟

世道喪純粹微名掠其美悲哉山林客過半朝市死夸
誕一相習澆浮益紛起古風日飄泊末路空頽靡堯舜
安得逢巢由亦已矣我歌竟誰和惆悵同心子

招隱

鱸鱠不容池鴻鵠常畏網全真貴遠到先覺每獨往綺
皓遺秦憂季鷹樂吳壤知幾効來世前識妙難賞勿謂
鳥獸羣高山適予仰

反招隱

伊尹樂堯舜伯夷傲姬周顏生一簞瓢陋巷亦自休豈
不困寂寞時俗非所謀脫身洒泥滓緬與前人游嗟哉
波上鳧徒爲信沈浮鴻鵠假長風不能占渠溝晞羽扶
桑阿刷翼滄海流世途旣超邈矰繳何足愁所以狂接
輿肆歌悟東丘觸時懷慷慨視世悲蜉蝣哲人有先覺
達者無近憂綺皓吾所師緒言起長謳

郡齋燕居寄海陵道粹儀真景休高郵不疑三太
守學士

尚容恥玩世畏景希就陰一麾諧微願千里非遐心平
生志江海寤寐在山林及此吏如隱始知古猶今鷓鴣
避落實蝟蟻安蹄涔但恐得已多尚非力可任諸公蓬
萊秀夙昔交契深擊柝聲相聞照鄰光四臨清濁涇以
渭離合商與參願言三秋思毋闕金玉音

新作涼軒會張拱辰至

張翁垂白鬢扶病過我廬向無俗客至適慰幽人居酌
此瓢中泉振茲架上書雖無德與汝會有歌起予欲識
消長情願君講盈虛

發桑乾河

四牡懷靡及侵旦肅征駢凝霜被野草四顧人迹稀水
流日邊去鴈向江南飛我行亦已久羸馬聲正悲覽物
歲華逝撫事壯心違豈伊越鄉感乃復淚沾衣

寄呂侍郎

呂先手數
日北行

荒山逢故轍自上重岡立君車不可望君手何由執旅

思隨日遠祖年背人急舞劍中夜與應知憂感集

廣陵蔣生生死十四年矣尸猶溫其妻與其女閉門

守之未嘗與鄰里通水火或者疑其有道而杜

君懿實之蓋嘗有自遠來者以書一封畀其家

視之蔣生迹也故俗以為仙因作五言贈君懿

仙翁棄妻子往為壺中客玉棺竟未掩人世已成昔白

雲無回期三徑滅餘迹猶傳有青鳥往往寄消息

新年

流光無停期二十忽復五古昔如我人功烈難遽數上

天終無私日月不少駐三皇與五帝回首焉得顧新年
 獨何為擾擾趁俗務壯羞兒女態浩歎覺已屢巍巍九
 重闕象魏懸法度木鐸非孔丘尼布衣欲何預滄溟百萬
 里乘桴意決去顧世聊徘徊非為取材誤子曰無材所取材東風
 發幽滯花彩映草樹爛醉苟自娛終焉背時譽

築室種樹

誅茅作吾廬種樹滿百株偃仰可卒歲優游問誰如墨
 翟不暖席仲尼無安居良知聖賢貴逝與功名疎清泉
 可深鑿惡草須早除適意田野間誰能歎歸歎

題所種金鳳花自淮北攜子種之云

愛此名字佳攜之不憚遠豈惟江淮闊兼恐歲月晚手
 植中庭地分破紫蘭畹綠葉紛映階紅芳爛盈眼輝輝
 丹穴禽矯矯翹翎展卑飛何在此寂寞難自顯按圖感
 形似覽物意繾綣三復接輿歌悲風動湘沔

得隱直書并聞將之洛陽

三月一得書始知去君遠開緘見無恙豁達百慮展秋
 風催時節搖落歲向晚遲遲行旅外色瘁足更趼邊封
 鳴狐狸牙爪貴鷹犬儒者非所須棄置自未免上書報

聞罷試吏何繾綣雖無小官羞頗貴有道卷洛陽雄王
都主簿亦極選折腰得免否局促時態淺

闕武堂

涼風卻炎暑飛雨除氛埃旅行得與會珍館爲我開主
人平生舊上客自遠來何異東序賢共此中山杯留連
恨落日披寫仍高臺山川愴興廢歌舞寄歡哀徐方多
賢牧天祿繼英才遊子悲故鄉爲君更徘徊

寄張十二時在城北讀書簡云幾至絕糧

新秋意無聊多病時畏晚出門塵埃隔扶杖行步蹇雖
聞一城居邈有千里遠風雨思雞鳴幽懷固繾綣食貧
非余病學道與時反悲歌空相望不復能裹飯

因甫移宰晉陵

自我游毗陵五年今于茲未嘗不閔雨未嘗不苦饑成
湯周宣世豈復能過斯上無桑林禱下無雲漢詩赤子
餓溝渠良田生蕪藜聽于閭里間愁毒不可爲思得一
賢人救其渴與飢上天似悔禍子乃今來尸愛民在恭
儉自可爲吏師但恐百里小膏澤難盡施子本湘鄉君
湘人望子來下難兄弟別上顧墳墓違將母以諭君上

書再三辭朝廷欣然許多士咸謂宜爲政推此心可令
孝者慈吾聞屠牛刀不貴于割雞思君苦道遠莞爾寄
此詞

同彥文送敦儒宰晉陵

朝廷貴儒術子以文學顯郡國重民社子由政事選榮
名信難兼衆望固不淺古人定何如壯志獨能勉由來
跬步益必有千里遠去去聆絃歌吾當謝言偃

九日

霜薄氣早寒木落景已變佳晨事厭勝習俗推往彥憂
來初無方興盡復自遣所遇無故物登臨殊非願

寓言

感豫常出異禦寇哀壺丘好大固累已巢父笑許由東
海有意怠飛飛何所求縱軀天地間細故紛悠悠願言
不死鄉可與賢達游

晚景

結廬玩蓬藿反畏人足聞杖藜有時去入獸不亂羣疎
雨洗徂暑夕陽澹微曛俛仰多物態逍遙遣塵紛興適
將何述寄心孤飛雲

野人致枸杞青蒿

味薄時共笑野人猶相高春田有餘暇饋我杞與蒿酌
酒謝其意採之亦誠勞城中多好事過半稱賢豪杯
具五鼎珠玉輕一毫將之獻門下皆有千金裘何故背
此計而反從吾曹淡泊徒自樂膏薌未能叨信知老農
美頗欲耕東臯因闕有餘力從爾觀芟薌

春暮到小園

春餘百芳歇喬木有輕陰客子成春服商絃應鳴琴獨
行迳世俗長往期山林庭竹風正駛池波雨已深臨流
窺躍魚倚杖聆遷禽順時寄俯仰適興契飛沈試謝及
門客未慙招隱吟

送雅禪師若神

太湖三萬頃澄澈浮寒穹明月不可取孤帆安所窮俯
弔滄浪人禪師若神與蘇子美遊子美自作滄浪亭緬懷鴟夷翁古今共灰
滅得失如夢中詩興觸物遠禪心隨念空猶多碧雲句

寄信東南風

蒼筤源

日出江氣暖步行村落間偶逢蒼筤息若在山中閒綠

篠旣蒙密清波自回環初疑人迹絕久有笑語誼脫足
涉澗水隔林叩柴關主人疎世事相見亦歡然稍覺耳
目曠久之遂忘還歸來詫舟子適過武陵源

樂郊陳漁臺下柏林中結茅作小亭命曰幽素本

懿臣刑部之書也謝且戲之

結茅更何好列柏自成林素履宜獨往幽人欣宿心炎
輝翳羽蓋清吹和瑤琴稍與事物遠忽如丘壑深良無
山水趣安得契知音

種蔬二首

時雨破膏壤荷鋤回城陰疾耕意不足覆隴力可任里
巷多父兄往來迹相尋見我山野服欣然用盍簪勸我
勿滅裂哀我識浮沈雖微生平故頗用愧其心採芝商
於嶺食薇首陽岑念我非其人豈敢慕山林聊以資素
飽身世實崎嶇丈人不我厭荷篠時見臨

種蔬南岡下地薄旱亦久抱甕出復入拮据病兩手輟
耕起長歎四海萬億畝過亢今若茲我誰與餬口縣官
祈雨澤四望已並走巫女歌且舞土龍矯其首上天何
寥寥百請未一偶霖雨待爾輩古人亦可醜咄嗟雲漢

詩萬古竟何有天地何不仁百姓爲芻狗

重陽

勞生惜流陰徂歲逼窮律
燦燦黃菊花離離紫茱實
芳香不可再采掇自有術
零落勢足悲盛時亦未失
登高散百慮驅馬恣所出
或云避陽九可以納元吉
嘉願誰間然且當醉終日

浚井

鑿井勿憚深汲繩欲令長
鑿深源不竭汲遠氣自涼
豈如潢汙水汨汨道路旁
雖復不遠求飲之劇燖湯
虛煩生四支渙浼不自強
野語合爲國願君著巖廊

古寺

唐殿弛棟梁空庭長荆棘
坳堂客水腥壤碣苔蘚積
經營東晉始遠近千歲
逼興廢紛可悲徘徊意不憚
尚餘土木巧未露斤斧迹
使鬼固已勞斯民忍終役
悠悠競頽波擾擾非一國
臺城更荒唐萬古共悽惻

書候潮亭

滄江浸長空天使限南北
繁陰屬暮歲波浪無時息
烈風何轟豗深木騰霹靂
遠吹湖中白來蔽江南
碧巉巖

千峯玉變化不可測恐是時向晚鬼神任胸臆燭龍銜
長耀來集崑嶺側又疑吳王兵如茶壓上國勇氣吞中
原晶光洞江北久望生悸慄嗟我問津客橫流豈難制
路險未可得吾道固當然滔滔欲誰易

徐安撫

伏波喜功名南伐終不返死餘蕙苴謗生恨鷓鴣晚干
戈非一方智勇易謀顯富貴誰不然枯榮子何反冥冥
炎州州隔杳杳天道遠荆楚猶古風招魂動哀挽從人除
憂謗不得志者罕

石首縣

叢石浮水中峻隄缺復連往往爲深潭波流自回環秋
山未搖落碧樹皆參天仰觀積水痕仍在高樹巔里人
半巢居出入隨烏鳶令尹亦菜色市樓寂無烟皇天不
純命百姓何震愆苦云耕織廢租稅尙未蠲赤子向漂
蕩所存皆偶然雖知負官輸未忍更棄捐奈何唐堯世
復見昏墊年何以救汝飢朝廷急憂邊

召諸弟博飲

今日寒頗甚淮南似京土江風旣落木山雪亦帶雨幽

居自無聊病臥亦寡侶壯心顧牢落出門孔多阻古人
戲臯盧志氣本尚武勝來在快意百萬不足數恨無酒
如澠杯盃空屢舉開顏強隱几豈必歎貧窶

別和弟

暫會復遠別惆悵終無極人生非神仙豈有頭不白維
舟相邀宿淮水風浪黑輾轉不復眠四聽人盡息丈夫
非懷安少壯宜努力況子行多歡自怪情不懌誰言冬
宵永達旦才頃刻雞鳴日光出握手各南北仰謝雲中
鴈羣飛接羽翼何以紓我懷作詩寄相憶

舟中夜飲憶和弟聯句

人生如浮雲聚散苦不定原向來詩酒歡雖唱誰與應

貢蟋蟀鳴在戶玉衡逼冬孟悠悠千里思寂寂中夜靜

豈曰無他人不如我同姓原吁嗟繫名利有若置機穽

窘然塵埃中恥無六翮勁訪戴舟已慙攀嵇駕難命貢

臨觴置不飲引領起獨詠莽莽天地昏誰知我心恹原

蘇安上之淮南十八舍弟之河北十九舍弟之漢

中皆會予賦三韻爲送

攜手常苦難傾蓋不易得今宵四面坐明日異鄉客秋

風楚懷悲出處各努力

鳳凰篇贈府公給事別

鳳凰起北海少留南嶽巔梧桐有餘音烏鵲相回旋耳
聞和聲樂目怪文采鮮雖知非儔匹慕用亦欣然祥飈
卷層雲迅羽凌九天卑飛忽如勢絕迹不可攀徘徊故
林下歎息高風前願及夔作韶率舞如舜年

承以鳳凰篇爲況謹用來韻和酬

吳育和作附

丹山鬱世表巖巖千仞巔自非常雛輩安得參周旋
胡爲此弱羽越籓祥儀鮮飛鳴過所據飈駭俄翻然

退則安棲地翔風娛楚天始病孰儔侶乃與朱鸞攀
英英日相照老翮徒愧前少別正傾聽覽輝當聖年

深甫往固陵

聞君異鄉客歲暮江淮間山雪夜多興桂枝春可攀南
風玩嵒窳浮俗矜游閒安所彈長鋏何當問刀環天倫
眉最白子舍衣仍斑勿學髡接輿伴狂因不還

飲郇公園贈章湖州何漢州

朝暉散浮陰天氣清且佳春城足行樂況此公侯家珍
館深窈窕茂林揚芬葩幽禽嘯新聲宿草含芳芽覽物

曲池平置酒白日斜因歌雍門詩四座皆歎嗟平生布
衣願不過東陵瓜致求多贏餘竟是迷紛華一醉稱日
富此風獨可嘉安能拘浮俗局若井底蛙客有章與何
高冠耀文綯方爲二千石會促別且賒他日還相思當
在天一涯歡極情難忘願君盡流霞

雪後到薦福寺梅下

行尋殘雪遠暖就梅陰坐悟彼寒氣消識此春景破留
僧迨日暮聽鳥忘巾墮從此到芬芳應須數來過

呈獻臣并序

始四月予來上清宮見石榴花方盛開已而復
有青箱忘憂紅絲夜合蜀葵朱槿芙蓉蒲劍紫
薇紅蓼金錢之屬相繼不絕而適及秋矣過此
又將有雞冠拒霜黃菊爲續豈神仙之居固自
嘉哉因歌以寄獻臣

茲心厭囂冗幸與上清鄰上清何崔嵬高靜違颯塵珍
林散玲瓏寶氣浮氤氳綠華未及衰絳葉忽復新開館
賓列仙祕殿朝衆真濃香無停期豔彩驚幽人顧謝武
陵子四時長見春

寄吳江大博徐君章

吏退簿書斂日落風景涼偶無事物累真得逍遙鄉疎
 花媚空園脩竹林蔭廣坐濁酒不難醉磐石可徑臥何必
 凌江漢乃能濯埃塵何必潛山林乃能寄隱淪人多笑
 此言此言未易笑非君契心賞誰肯過蓬藿

觀魚臺

城下春池深潛魚時復躍高臺可以望暇日從爾樂散
 懷混飛沈適意宜丘壑始悟濠梁翁荒唐謝名爵

府公射堂飲酒輒陪尊丈侍郎兼揖諸孫拜獻拙

詩

煌煌南極星粲粲北維斗稟齡瑞明時運柄變萬有降
 神非尋常希世曾一偶積善如公家于今見純佑安車
 告歸日三府升平久萬石均祿秩魯公拜前後茫茫周
 漢來此事復聞百黃金鑄大印綠絲綰長綬方為累世
 榮况多後來秀戲禽試強弩勸客滿春酒賤子敢再拜
 願公更眉壽

秋陰

浮雲初無心已南復更北蕭蕭清風急忽忽白日匿時

逝物稍變感集意鮮適立蟬號庭樹蟋蟀吟四壁自古
共此悲豈伊越鄉客

久陰

南方信卑濕風雨無時節春風仍晚寒陽和恐中絕蛟
龍乘江湖雲霧欺日月驅除懷熏風悒悒生內熱

蟋蟀

七月鳴在野八月鳴在宇九月登我堂十月入床下滔
滔歲方晏促促聲亦苦悲秋不悲已終夜如獨語時俗
有新聲誰能一聽汝

送王十一還乾州

窮通蓋有命富貴不能早君侯希世珍三十未爲老棲
遲升斗祿奔走周秦道及親固爲榮捧檄豈辭小北風
正凝霜千里徑無草人生貴感激豈以外物擾當爲昂
藏駒勿自使枯槁

坐嘯亭納涼

長嘯振林木半空鸞鶴聲清風蘋末來孤月海上生坐
久物色改如有神仙迎

王昭君

嬋娟巫峽女秀色傾陽臺昔為一片雲飛入漢宮來明
 鏡徒自妍幽蘭誰為媒丹青固難恃遠嫁委塵埃十步
 一反顧百步一徘徊出門如萬里淚下成霰摧左右相
 娛樂絲竹聲正哀豈不强言笑鬱鬱不可開黃河入東
 海還從天上回嗟爾獨抱恨一往擲蒿萊

重一首同聖俞鄰幾持國作用前韻

昭君信絕世窈窕祕瑤臺歲華坐將晚玉輦何當來一
 以畫為賞有如鳩為媒含悲下紫殿卽路指黃埃光豔
 動左右君心再徘徊白水不可變孤芳從此摧盛時能

幾何千載獨餘哀至今青塚傍積怨昏不開掖庭用色
 選丹青以利回寄語閨中子何憾處蒿萊

憶松

松陰何婆婆松蓋何偃蹇松香不堪折松色無可選旦
 暮青松間吟懷未嘗遠嚴霜百木死高秀初欲展泠泠
 海風飄輝輝甘露泣昔年予居閩時甘露降去矣混塵滓懷哉邈
 林巘諒無刀斧憂千載行可踐輦轂念山海誰期共攀
 拳獨有風入聲琴中尚悠衍

留侯

張良韓孺子夙昔志未伸授書黃石公問禮倉海君契
合見神助濟時効經綸指揮轉雷電顧盼定楚秦以彼
三寸舌抗茲百萬軍一爲帝王師晚就赤松賓富貴心
不屑功名諒誰論出處何昭昭賢哉古之人

錄近文呈晏公

麟趾感素文躍魚赴鳴琴殊類豈自識至和動其心濟
世有先覺鑄人不鑄金剛詩在正始好樂非好音萬生
依陶冶一氣諧飛沈賤子晚及門獨學謬知今趨隅誦
所志踴躍不自任救渴而飲河栖枝以巢林量微志復

小俛仰感高深

讀晏子春秋 并序

世譏晏嬰之節偪下夫晏嬰大不治宮室細不
治冠帶無衣帛之妾則信儉且陋矣至其脫左
驂以濟越石父之困出倉粟以成北郭騷之孝
又何其裕哉世之君子未嘗道其裕也而獨病
其陋是以宮室則必修冠帶則必麗陳妾則必
富所惡陋于已者從矣所能裕于賢者誰哉吾
聞陋于已裕于賢之謂儉陋于賢裕于已之謂

吝晏子固儉矣于聖人之道何貶焉

平生實善交厚薄等新故解驂濟越石調祿謂車御猶
稱禮偏下未免儉則固高風往既息頽迹後方鶩陳妾
輕綺紈賢士傲襦袴若人不重得遺論今始布吾亦太
史徒執鞭所欣慕

公是集卷七

公是集卷八

宋 劉 敞 撰

五言古詩

以近文投謝學士

自昔周旦死珍鳳闕空戀民斯未嘗見猶取圖象觀況
彼聖人沒衆說紛無端能言拒楊墨豈祇均遺鸞念我
生苦後讀書樂瓢簞潛精探遺文倣象良云難猶如琢
圭玉放法求所安雖無繩與矩我知不爲丸凝誠矢弗
變勢利非攸歡譬于寸木微積久能巒岵有羽必懷聳

有聲必希彈方期沐清德敢不振斯冠

答吳冲卿學士

人生若浮雲聚散不自知昔與子相逢綵衣汝水湄兩
家賀羊酒道路生光輝變故一朝革各在天一涯我病
陳蔡間固窮莫自持君爲周南居流涕極所思日月忽
已改舊游不可追豈悟羣玉峯攜手如素期感愴從中
來當歡反成悲求友聆嘉音喟然見新詩廢學老將落
積憂志益衰俛仰諸公間嘿嘿慙見嗤子我平生交夙
昔聆箴規相愛當見勗勿同衆人爲

寄朱三學士

憶在京輦居相與巷南北幸非勢利合同有春秋癖往
來熟杖屨假借通經籍誰謂數斯疎要云諒且直別離
淹日月寤寐見顏色惠我以好音欣然對真迹微官事
如毛徇俗頭欲白庸知尚可教願子更良食

送李紉學士請示江韓諸君

我醉闕門外臥備東藩臣君從天上來秀色落青雲留
連三日語多得所未聞僻陋不自知喟予久離羣南風
吹白沙六月天晝昏送行不盡境引望空復勤相識何

公身集

卷八

必舊白頭或如新有信當寄書毋遺傾葢人

今日

今日風淒冷始覺陰氣繁白日無光彩未敢啓前軒卜
居止容膝他時用爲嘆及此殊覺勝閉塞有餘溫撥棄
當世慮縱觀上古言禹稷稱櫛風孔顏樂閉門窮通或
相背勞逸足自論優游蓋卒歲達者嘗有言

送李才元

車馬何赫奕觀者更歎息富貴歸故鄉任州二千石賜
金爲親壽衣錦供子職里閭納華駟公堂列嚴戟地兼
百城會衆有萬戶籍指擣吏奔走宣布民悅懌丈夫雖
非通豈負稽古力懷章過故人笑別見顏色吾徒若匏
瓜長繫慙不食贈君當何言有信勉相憶

送焦生

蒼鷹懷風雲六月不忘習寒蛟待雷雨深水聊自蟄冬
君起江湖力學如不及擇師視洙泗履奧窺所立翰飛
自茲遠變化誰能繫孤劍屢感激四方慎翔集公子誠
愛客相門許長揖結轡因北游揮手謝朋執藏書就史
氏觀國榮天邑籍甚諸公間青紫亦可拾寧復悲歸來

眷眷兒女泣

聖俞受詔行田是時聖俞葬其弟公異未畢而去
蟲潦敗耕耘西成絕人望鄉農籲天意守闕書屢上憂
民聖天子擇吏賢宰相王畿蓋根本歲賦在寬放曰君
往行田究彼荒稔狀一當薄其租用以息民謗朝廷慎
指使推擇無與讓非君精明姿曷以致忠諒憂公劇私
爲卽夕治行仗懷悲念其弟卜日不果葬乃知體純粹
世士難以尙德澤旣敷宣風謠還歷訪歸來悟明主自
致誰云妄

張老子出田所

魯人有林類底春獨被裘沿畦拾遺穗帶索仍長謳知
命忘其老樂天固不憂旣驚端木賜復感東家邱夫翁
何爲者歲暮亦遠遊北風吹白髮蕭颯田隴頭此意如
昔賢世人知爾不

同聖民圍棋釣魚

山林自微尙軒冕非所營每及逍遙趣欣然得吾生春
塘漾綠水珍樹啼黃鶯心遠忘外喧境幽識人情垂釣
如有求而無得失驚臨局非期勝聊爲白黑爭得意物

可遺忘言賞逾精此理俗鮮悟固當屬淵明

秋園晚步

秋物足悲咤丘園良考槃翺翺攄結慮徒倚縱遐觀爽
氣使心厲淒風令自單酸念無筮託那使百憂寬鳥下
見人寂蟹啼知露寒夕煙起城際反照映林端竝立不
能返迷懷增屢歎

競渡

三閭雖已死郢人獨見思五月江水深遶城碧遷迤輕
舟爛龍鱗利楫劇鳥飛簫鼓駭蛟龜鷹隼亂旌旗爭先
愛中流觀者被水涓漠漠懷沙魂一去不可追千載萬
歲後兒女以爲嬉已矣國無人終焉莫子知

讀離騷

空庭衆囂息風葉獨紛紛秋期此時改感歎坐黃昏遠
懷靈均子著書爲平分念爾剛直心吐茲清麗文上嘉
唐虞世下悼商周君能與日月爭不能卻浮雲浮雲蔽
日月歲暮奈憂勤精誠誰謂遠恍惚若相聞

秋過臨波亭寄陝府資政給事

不復池上遊秋意忽已繁臥柳半死生枯荷自翩翩憶

公集 卷八 五
昔載後車逍遙臨中園觀魚有縱辨運斤契忘言豈獨
歲月晚正傷離別魂人退室空邇幽興誰與論

讀聖俞我今五十二詩感之

子真神仙吏不識傷別離忽逢舊交歎始悟人間悲歲
月流水逝富貴浮雲馳徘徊往事感激吐新詩流水
難以追浮雲難以推百年半如此萬事從可知且欲拂
衣行聊及鱸魚期君若變名姓相逢復何時

上嶺下嶺

上嶺惟恐遲下嶺懼顛覆一嶺但數里思慮千盈腹不
聞二大夫致身未嘗辱

送袁同年殿丞陟通判撫州因還洪井舊居袁在

朝數上書言當世事某與袁別十年矣語舊多
可悲者留三日乃去

輕舟何翩翩斲冰浮清川問之亦奚樂歲宴道且邈云
我大梁客游說萬乘前畫策不見收故鄉復言旋薄祿
及吾親就官若歸田名實兩有適遠近誰間然憶昔都
門別爾來彌十年蒼蒼豫章質更覺摩青天語舊或涕
流舉觴愧留連相從且未果使我心勞悁

送裴殿丞

君已頭髮白猶著五綵衣出門我意失贈別雙涕揮自古不擇祿念公早旋歸天歡固爲樂外物焉足希達矣老萊子千年見餘輝

裴殿丞訪別說春秋期歲初復來

吾衰不夢周知我在春秋斯道宜未墜夫公能見求相

看頭可白感別歲空道念子期雞黍母懷汗漫遊

殿丞此君

好道士攝生之術

送雍秀才歸瑯琊山

希聲未易合皇華衆方笑與子東西人相逢偶同調億年寄神解萬里在心照此間豈容言吾得安蓬藿煌煌千金珠舉世矜賞好安知緯蕭翁棄置久高蹈盛論山水趣局促恨未到江湖且相望送子一長嘯

鳴禽

朝日升屋梁喧禽鳴樹巔東風不相期自與春意旋振衣起前庭天色綠窅然非煙颺微和目極相繇繇行尋林間步萸英已可攀萬物在陽舒胡爲慘不歡幸有二三子采芳玩華年不及古之人幽懷聊復蠲

驚禽

幽鳥何所託高棲衆林端風巢雛穀危露葉毛羽寒半
夜吐明月驚鳴遞囂謹迎光怪焚巢顧影疑飛九何爲
貪擇木通夕不自安乘高非爾謀宜下易所觀不見丹
穴鳳深居全綵翰

八角井

誰鑿八角井不方亦不圓此地饒美水此井獨苦泉泉
甘常早竭泉苦更永年浪得世上名對之還慨然

雨過張先生

稟生本迂闊習性益疎懶遇境賸欲留得人輒迷返先
生老鄉曲素髮頗樛散相遇年已忘心親禮逾簡幸無
富貴憂時可青白眼驚呵左右人邂逅以繾綣初隨朝
陽出忽報山雨晚天路良幽艱歸途失平坦

寄公默先生

昔賢避言色先覺如觀火作者有七人清風緬遺我浮
俗滋缺缺羈人畏瑣瑣知言豈易值卷迹恨莫果所願
學孔子無可無不可寡過知未能同聲賴銘左

恩賜御書呈同舍諸公

聖神紹先古述作備新書微生濫中祕重賜等諸儒日
月明天文龜龍粲河圖精神駭耳目黼藻賁泥塗發揮
篋中藏更得神宗初光華混新舊筆墨肖錙銖幸生堯
禹間而見典與謨上爲四方賀善繼古所無下竊私室
榮摺紳誰與俱漢史探會稽周臣覽崑墟蕭條千萬里
筋力固已劬而我獨何人荷寵安厥居受學庶無負傳
家旣多餘願從二三子講誦無時虛

與景仁聖俞飲景葵西園

鬢髮今欲白山林未能往每逢負郭趣嘿有歸田想置

酒松柏間當春更蕭爽欣欣二三子相與留一賞早花
何娟娟秀色傾宿莽馴禽聲喧呼永不息羅網物情樂
于適未必在深廣育育井中魚胡然困偃佚佳哉主人
翁示我以天壤放懷寓一醉益愧鳴佩響園井中有魚數十頭

送懷安李使君屯田

汝穎多奇士磊落布方冊先進存古風若人復令德詩
書秀英華鷹鷂勇排擊曩者從軍行早聞平戎策縱橫
志未展慷慨意更激坐驚齒牙脫忽使頭髮白頗與嵇
阮同閉關以藏迹老驥甘道路黃鵠羞斥澤復持一麾

去堅取萬里役旌旗暗長亭已想蜀山碧鼓吹喧前除
稍知楚風易專城自足貴遠覽固多適胡爲結離愁恨
此晚同得

題賈大夫射雉圖

控弦誰家子馳射落名翬傾城絕代女巧笑揚脩眉覽
古按圖書悵然增我唏壯士不擊賊顧從兒女嬉威弧
無用世反事禽荒爲嘿嘿千歲後正爲來者嗤

示張直温

築山必使高鑿井必使深百工戒淺近盛德羞浮沈焉

有尺寸枝能棲垂天禽焉有升斗泉能容橫江鱗借茲
諭物理足以開君心隘在容不足弱在力不任大道如
路然固無古與今

臨淵亭望鳳凰等山作

孟公多勝詣故在杯酒間雖非菊花時輒復尋龍山平
明騎馬出日暮倒幘還若人難重得此風猶可攀問我
亦何爲翛然方閉關忘言在得意獨往路已難

聞隱直欲調官

蛟龍居池中仰活數掬水虎豹離山林求食輒搖尾張

君宜大用亦是龍虎比何得圖小官折腰五斗米屈伸
蓋時命隱顯乃君子譬由合抱材當自毫末起昔爲青
雲高今落塵土裏可嗔復可驚誰能叩天耳

津亭

西風豁愁陰天水兩涵泳微波蕩寒日極目萬里淨離
披蒹葭老蕭瑟原野迴物容驚客懷櫓聲動歸興倦游
髮恐白多慮身復病緬慕蒼梧雲無心自輝映

和持國登開寶寺上方院寄孔寧極崔象之孫曼

叔

重山抱城起清川帶野回深嚴古佛寺嵒嶮聳高臺此
地宜眺覽冠絕都城隈遠近見千里令人心目開憶在
七月中丞相自魏來百官迎道傍休騎茲徘徊衣冠相
勝凌塵土如炎灰我隨衆人趨出入再歷階不得及此
時披襟濯氛埃至今意耿耿負愧不可裁邇來讀君詩
足慰平生懷忽如升其巔四顧心悠哉往者不可及信
陵久已頽來者不可見孔侯與孫崔古今殊茫茫慨嘆
成歡哀會復從君遊于焉謝崔嵬

臨波亭飲席贈徐二

華星爛長天明月被清池良景豈易得佳賓共在茲形骸久相忘卮酒安足辭高歌激風颿宜笑散春暉中置浩長歎民生信多爲非無逍遙鄉固在閒暇時及爾不快飲歲月忽欲馳世事紛紛悠悠放言爲吾師

送張四隱直遊邊

吾昔讀漢書遠嘉馬文淵慷慨有大志不辭走窮邊嘗言功名期當及少壯年生圖萬里勲死裹馬革還此語頗豪蕩書之在青編其人雖已亡其意猶凜焉羌戎未伏誅王旅多喪偏安得如此人西行隴與汧借籌資方

略還爲天子言海上惟歎息今時豈無賢忽聞張公子奮起殊欣然歷覽涇渭旁究觀敵根源寧復謝古人正堪豁憂煎衛青出行伍去病幸有天相繼取封侯有若翻手間男兒誰不如可得甘棄捐讀書反三黜何用師孔宣我豈少游徒規規守鄉田力弱非志弱送君心長懸

同貢甫詠丁晉公園池

一死復一生一虛復一盈猶悲門易軌况乃谷爲陵曲池久蕪沒高屋尚崢嶸自古若傳舍毋爲方歎驚

送韓七寺丞知蕭山

原註韓穎川人兄弟八人皆仕宦顯名

君家潁川上時論數八龍
聲華自照映遠與高陽同
季慈又青出秀氣凌秋空
安步可遠到何為菰蘆中
會稽自禹來山水天下雄
古人每獨往勝事殊未窮
聊欲因弦歌登臨極江東
超然語高邁令人媿樊籠
我昔更此邑稚年尚兒童
邇來成夢寐自笑成禿翁
安得方寸金換君腰下銅
越吟不自然極目南飛鴻

初夜

汲汲晝彌短悠悠夜增長
貧家不具燭坐須明光
春隱

几四寂默陰蟲鳴我傍
天時有推斂物性隨悲傷
感彼忽自驚喟然發心狂
壯年何所成憂患攢中腸
咄嗟牛衣叟婦女知激昂
國恥吾亦羞如何埽封疆
譬如籠中禽左右不得翔
知音古亦稀誰謂歌中商

靜夜

花影不可埽縱橫月明中
光芒衰新露香氣生微風
夜永興不淺幽人與誰同

迎恩甫

相別才一月相憶如一年
豈無白首游不及夫子賢
邈

公是集卷八
近發寤寐奮飛絕由緣忽聞乘春浪千里下歸船鷄黍
可以具班荆暢幽悃

公是集卷八

公是集卷九

宋

劉

敞

撰

五言古詩

雨中獨居有懷江梅

晨起風雨交蕭蕭秋意寒出門無所詣行道如此難思
我平生游相得他日歡興來未嘗約趣合不待言濁酒
有與醉孤琴能一彈時時商聲歌磊落千琅玕浮雲歸
無期宿草秋向殘獨咏雞鳴詩一唱三四歎

過聖俞讀其近文明日寄之

公是集 卷九 一
昨日過君家雙瞳偶清刮非無塵俗累喜見秋陰豁
琵琶請新聲瑤音邈超越神驚自束躅不爲天寒發

憶梅

豈無棟梁材爲君構明堂豈無調羹資爲君致烹觴
獨使限荒鄙委之道路旁歲晏吐奇秀芬芬有餘香
疾風見松柏衆穢知蕙芳譬彼君子質幽沈道逾彰
安得假神術徙根儷長楊遼哉計不果我心不能忘

傷胡二

人生期百齡子適四之一人仕期萬石子適升斗秩稟

靈甚純粹守道復貞吉無負于神明如何有倉卒雖登
爵一命亦治邑千室名竟未達君澤亦不被物鬼神莽
無狀天道眇難詰冥冥九原深永與顏賈匹

觀永叔五代史

大均運元和萬物分一氣相雜以成文自然故爲貴道
衰三王末議出百家沸仲尼日月也薄食爲之旣春秋
日筆削天地復經緯大法初粲然亂臣以爲畏微言迫
秦漢變雅從晉魏逐末競錐刀澆淳玩花卉安知述作
本庸識文章意中間馬與班二子稱髣髴猶云崇貨力

尚或排剛毅才難乃其然可以長歔歛退之不爲史于
道其猶未胡爲體明哲曾是回怨誹國典竟蕪雜唐風
亦隱匪陵夷九易姓禍亂森如蝟儒術駭中絕斯民遲
攸暨紛紜混朱紫清濁誰涇渭龍飛真人出虎變斯文
蔚天意晚有屬先生拔乎彙是非原正始簡古斥辭費
哀善傷獲麟疾邪記有蜚處心必至公撥亂豈多諱何
必藏名山端如避羅尉曰余仰爐冶有意自勅荆踵門
投耒耜假蔭親蔽芾所望窺冊府無寧辱調餼狂者實
進取日中固必焚飲河雖非量滿腹尚自慰演孔幸受

經居齋竊忘味

寄張拱辰

楚人少眉壽此翁七十餘荆士多輕揚此翁乃好書世
醫悅膚淺此翁識古初習俗爭錐刀此翁尚立虛數欲
見此翁爲其亦起予責人必求備堯舜猶病諸漁者公
閱休逸人狂接輿有之幸見告我且從彼居

休輿比楚人

竹牀

櫛櫛裁脩竹熒熒粲寒光浮筠凝煙霧疎節留雪霜甘
寢百疾解側身夏日長此時四海波亦已如探湯嗟我

智慮短苟爲安一牀

哀三良詩

并序

秦風有哀三良詩刺穆公以人從死後王粲作
哀三良者與曹公以已事殺賢良也陳思王亦
作之者怨已不及死者也吾以哀三良仍有餘
意猶可賦詩故復作焉當有能知者

士爲知己死女爲悅己容咄嗟彼三良殺身徇穆公丹
青懷信誓夙昔哀樂同人命要有訖奈何愛厥躬國人
悲且歌黃鳥存古風死復不食言生寧廢其忠存爲百

夫防逝爲萬鬼雄豈與小丈夫事君謬始終

馬生自汝南來求入太學不得請詩以歸

士貧謀國拙安得辭泥塗馬生負長劍嘆曰歸來乎尺
薪等芳桂斗粟兼明珠王門不見容憔悴如枯魚我無
升斗水慰子朝夕須亦有西江濤路遠不可圖相勸早
旋歸詩書自爲娛男兒患無術餘事從卷舒時至當奮
飛翮如巢中雛微物尚變化况君七尺軀

詠史

主父希世者畫策妙縱橫指麾一言用震動諸侯驚日

公是美

卷九

四

公集
卷九
幕臨遠塗中道方倒行不忍藜藿食竟從五鼎烹寧知
鹿門翁白首長躬耕天下非所保功名安足營

入荆江

此江自岷山浩瀚浮西極中爲三峽束壅闕氣憤激崩
騰得平地千里怒未息雖投洞庭闊爭道猶逼窄觸岸
皆倒流勢兼萬牛力渾黃不可鑑咫尺膏玄白頗似崑
崙流洩源下積石逶迤屢屈折九曲乃大直始信枉渚
歌至今猶悽惻中流忽沙沸慘慘半江黑俄頃成丘陵
方舟渡安得坤儀理專靜何故輒損益多異真窮鄉所

逢豈中國墨生忍黔突孔子不暖席賢聖亦遠遊吾寧
倦行役

和鄰幾持國景德寺納涼

四時急相乘五月大火中天地爲熾爐萬物皆沸銅吁
嗟望雲漢長嘯懷清風覆載雖厚高跼踖似不容蚩蚩
道傍子奔走勞厥躬外以塵土傷內爲利害攻狂醒無
由濯勢與羣物終安知道遙遊采真得所從寶宇豁高
嚴劇談叩真空虛白從中來清涼脫樊籠惜哉但獨樂
不與斯人同作詩寄妙賞藐若凌青穹依隱或玩世詭

時在不逢三復金玉音曠然已發矇

送劉初平謁會稽范吏部

劉生大梁客五十恥獨醒觀書汎爲通不肯明一經壯
歲懷慷慨邊游忍伶仃擔簦售白璧垂蒯提青萍歸來
面朝土口寫出川形公侯盡高意禮數爭分庭落魄破
小節浮遊謝塵冥詎諧若流輒捷勝如建瓴荏苒混朝
市繽紛邁年齡有云致官爵百說無一聽二子才劔映
衆豪固螟蛉以茲滯玉帛亦不差巖坳太尉辟開府夏
也中丞請居廷孔道輔也拂衣東南走高揖千巖青禹穴發

窮寶雷門叩驚霆邦侯萬人傑憂國心無寧得善輒解
榻發奇肖開硯抽辭肯聽瑩宴舊方淹停箬下進醕酌
鑑中結飛船高哉鴻鵠心去矣窮滄溟

謝主簿示雜文

少不學爲吏僂俛亦非良終日簿書間忽疑鬢髮蒼無
聞畏後生素習成兼忘吾子豈獨迷相從道文章上論
聖賢心下救世俗荒磊落古人風粲然在我旁精孳矻
日月爰居惑鏗鏘置此但爲好切磋非所望

開元寺

寺在汝寧府本顏魯公真卿舊居

公集 卷九
自古皆有死豈惟直如弦魯公既中天狂寇不獨延茲
寺數經亂叢林廢爲煙若人昔所居故老廣其傳直氣
觸白日沈憂凌青天悠悠穹壤間肯與蛛蟻捐事往理
冥漠悲來涕潺湲作詩識其處尙想音容全

漢武帝二首

武帝固英雄總孽皆軼材南并桂林地北守單于臺軍
費累萬金馬迹窮九垓時獨卜大夫規規輸其財忠義
豈不然告緡自此開茫茫文景後田野卒汗萊孰謂將
相謀竟貽黔首哀晚悟富民侯後時信悠哉

洪波漏金隄河伯獨不仁不有封禪行安知愁吾民翩
翩海濱子自以通鬼神黃金成虛言鴻飛邈無因武安
玩天時獨秉萬國鈞愴似宣房詩郎吏終負新寂寞千
載間真僞共沈淪何乃忘謗書世固無直言

楚風四首

三楚多秀士從古謂之然接輿旣髡首三閭復沈淵太
屈備時玩白珩爲世傳粃糠鳳鳥歌瓦礫離騷篇已矣
德旣隱孔車爲回旋

嚴嚴章華宮灼灼高唐觀慶弔隨俯仰離合異昏旦人

生詎能幾物化每交亂千秋萬歲後寂寞江與漢
宜僚樂市肆叔敖榮寢丘不惡漁釣卑吾聞公闕休顛
冥天地間世與我悠悠豈悟多種橘可齊千戶侯
唐侯兩驕驩夙昔困多難蔡國雙狐白豈知反爲患世
衰道回適服美自取間敝縕可終身鴻飛諒何篡

雜詠

今年四十一髮白牙齒脫未能遊逍遙意每不自豁偶
尋樂天詩往在江州日年幾與我同衰疾與我埒伊人
了無生外物均寂滅而且于形骸變化難自適況我狹

中者萬緣日相伐力小覺任重憂多使內熱安能保平
和但有就衰竭賢哉香山翁精識妙前哲懸車未六十
鼓缶終大耋以茲揆損益亦似有與奪至理何心得吾
其守茲說

二十六日大風寄貢甫

雨止天大風草木皆怒號居人不得寐起見星月高鳥
獸羣悲鳴空虛如波濤行子今安至愴愴我心勞山川
幸非遠歲月亦未滔自傷下澤車不及鄉里豪袞袞隨
飛蓬悲歌擊長刀丈夫寒如此何愧兒女曹無由託飛

公集
卷九
雲更寄身上袍

黑河館連日大風

空桐倚不周近戴北斗魁上天限中外自古常風霾我行迫隆冬周覽窮荒回魑魅醜正直共工負其材初如百萬兵鳴鼓天上來日月慘不光星辰爲之頽又如海水翻洪洞奔天臺四顧無復人但聽萬壑雷搖山墮危石略野荒織蓼鳥雀失食悲虎豹亡羣哀大叫不自聞卻行尙欲摧而我仗漢節何由脫氛埃先王外荒服赤子棄草萊陰奸竊號令天網殊恢恢我車傷崔嵬我馬勞虺隤感彼鷄鳴詩聊以慰永懷

奉和永叔夜聞風聲有感用其韻

往爲名山客浩蕩多奇觀六月湖海臥飄飄生羽翰悞升紫垣籍草野非所安金火三伏交束帶愁衣冠飛塵變形骸內熱焦肺肝豈惟天有時人事亦可歎適有涼風來蕭騷庭葉乾感之意飛動忽若驟龍鸞銀漢水可涉枯槎去無難洞庭魚正肥遊子行足歡飲酒讀離騷睥睨天壤寬要當以樂死日月誰控搏夫子文章伯已在青雲端且方濟一世詎肯哀盤桓作詩破冥煩磊落

冰雪顏懍懍屈宋詞千秋劇椒蘭

春旱天多風贈深雨

春旱天多風十步不見人自非勢利役誰肯輕出門我亦閉戶居寂寥臥晏溫歎息中庭花散隨扶搖翻百芳半摧折白日或翳昏安得超塵埃高乘雲雷奔壯心更激烈中熱生肺肝愧君憂陋巷眷眷迂輕軒高論清我懷忽然失冥煩

呂梁

呂梁信天險魚鼈不可游引棹出叢石一緮用百牛洶湧含風電蜿蜒噴蛟虬世自有畏塗吾仍恥隨流側見百仞奔俯窺千丈幽自非跂達觀未易寬百憂夙昔涉老莊縱心會虛舟忠信猶足恃放言禮門由

蜀岡南麓

山深行易迷南麓偶清曠鷄犬鳴谷中樵童戲巖上茅茨肖浮居牖戶相背向竹徑通往來清陰亦彌望白頭三四老相見語歡暢心疑避世子形迹一何放行將從之遊自恨苦羈鞅不能問姓名聊作招隱唱

種竹偶書

少有王子癖長憐此君雅常嫌地喧窄不敢謀瀟灑昨日山客來勸我栽砌下感荷知我心遂得移遶舍其中置磐石可以措尊斝于此更一座以待違名者山禽時復來清嘽如郊野其餘卽無見不辨春與夏吾惟厭時俗人亦來者寡順然兩無議外譽焉足假新筍漸盈尺新枝已鋪瓦燕雀勿相驚深沈似隆厦

勸思弟子南軒種竹

世皆笑幽獨何不少自貶種竹南軒間亦足以相檢況茲歲華晚衆卉日凋歛清節良自如栽培匪爲諂豈知牕戶側秀色窺荏苒會茲東南美相對情不懶楚人昔頌橘行比伯夷忝此君最孤高堅直難外掩凜氣有精粹筠光射圭琰他時雪中客往往疑清剡

古俠客行

壯年志慷慨結交慕英雄大梁多長者燕趙有古風千金起爲壽一話不顧躬自謂松與柏忽爲萍與蓬市道今乃知利窮非義窮

深甫過留宿并示近詩

別長會時稀樂少憂日多邂逅非素期悲歡奈君何明

燈照空牕風雪滿天地此時坐相對達旦終不寐少年
慕結交徒以此方寸危生始自感來日安可問意氣久
已奪形髮亦已衰如何切磋意不廢平生時驚禽墜虛
弦病葉損輕露一聞傷心奏涕下已如注

留張十二宿

少年有佳趣老大意獨驩常恨離別久忽忘會聚難殷
勤置杯杓蕭散遺衣冠誠知惜短夜爲我強盤桓

和鄰幾八月十五日夜對月

外事已波濤回首已陳迹獨有雲間月相見不改色慰

我平生懷故在中秋夕我髮見二毛羈旅多所歷每逢
桂花秋興發勸更劇江湖與山林所至得真適今年都
城游日與賤事逼得閒輒昏醉向晦專寢默覺醒忽天
明不見千里白誰令心賞違坐使歲華隔徘徊不自愜
悵望空歎息見君新詩章暫若對寒魄清光動人目諷
詠當自釋

腳冷

踐霜腳如脫知我血氣衰况復齒牙落鬢邊亦有絲人
生會當老何計遲速爲但願多美酒憂來忽如遺

和江十飲范景仁家晚宿祕閣睹伯鎮題壁記番

直日月感之作五古

阮公有大度于世無所營顧獨好飲酒而欣爲步兵未
嘗語是非舉俗駭且驚夫豈知胸中礪礪獨不平西登
廣武原咄嗟豎子名塌來蓬池上詠懷激哀聲此風久
不聞寥落成千齡鄰幾頗其流貧賤能忘形校書天祿
閣不忍游公卿時從好事飲傲兀人間情髮白不自疑
歸來臥前楹顧是壁上書始知歲月傾喟然感舊交因
欲東南行黃鵠真去矣白雲遠冥冥吾聞至人語大塊
勞我生天地一毫間出處何重輕但使樽有酒長醉不
用醒君當解此意獨往何必清

賀王介甫初就職祕閣

鳳凰信高遠矰繳安得羈非君九韶奏詎肯一來儀王
子美無度孤飛絕雲霓常恐濁一世斯人莫見之天子
蹈軒虞公卿聚臯夔孰言阿閣下定有朝陽詩願得調
律呂聆音辨雄雌毋空著圖象但取夸童兒

修府學後同官僚見諸生

用儒沐休運撫俗奉明詔雖愧文翁治猶非武城笑茲

堂丞相規頗盡泮宮妙高閣橫書冥長廊鴛鴦窳春秋
大復古修舊非所誚庭壇一已新丹堊歛相照迂疎賴
衆才簡默希坐嘯況多都邑賢歷講道術要藩籬可目
涉弦誦或耳剽汜鄉亦何人千載名獨劭

煌煌京洛行

紫極開天門慶雲麗皇居卜郊定九鼎懸闕觀寶書德
澤浸無疆風俗返華胥冠蓋百萬家車馬十二衢輕肥
耀朝日富庶極中區游俠信陵後節義大梁餘顧盼生
光輝吹拂動萎枯貴賤且貿遷高陵忽爲墟變化若有
神升沈豈嘗拘咄嗟鄒魯士何用空躊躇

代書寄鴨腳子于都下親友

予指老無力不能苦多書書苟過百字便覺筋攣拘京
都多豪英往往在石渠作書不可周寄聲亦已疎後園
榷佳果遠贈當鯉魚中雖無尺素加餐意何如

寄貢甫時隨侍入蜀

曩別百里近愁心亂清秋今別百里遙秋色縈遠愁我
飛乏羽翰我居悵淹留忽如轅下馬局促難自謀古人
有先覺不願往諸侯我乃今知之曰歸邈無由朝吟南

陵篇暮泣梁山謳離魂如明月昔昔西南流

戴村

羈旅淹歲改江臯屬春早幽村屢獨往勝事時默討深
竹尙殘雪陽崖已芳草茅茨忽連接鄰里自相保人猶
安道族景是山陰道徘徊問耆舊或遇棲真老

種瓜瓠

吾生拙用大江海思遠適豈獨爲匏瓜長繫取不食漆
園有遺意放蕩豁心臆樹此無何鄉近身見多益五日
抽一尋十日成百尺纍蔓更相引甘實行可摘因之浮
汗漫去矣笑踟躕從我其誰歟由也不可得

簡深甫

與君一城居其實跬步間慊慊不相從十日俄忽然一
城豈爲遠十日豈爲短客子局人事心與迹相反而況
各異鄉茫茫隔山陂歲時若奔車過去誰復推伊昔厭
幽獨願子東西鄰雖鄰尙不覿何似南北人人間實如
此千別能一會與來卽上馬埽榻聊相對

贈陳襄祕丞自峽中召歸

淮海南國衝冠蓋結浮雲面交固不數白首猶若新之

子天際來各自東西人一語旦連夕歡如平生親豈伊
 名聞久固以意氣均馳騫詩書閒博哉醕乎醕我昔病
 俗學莫明聖與仁常恐遂至地豈期晚有鄰君遠觀清
 光一二席上珍賢者任必重勉旃覺斯民
陳迥此與共
 談性命仁聖
 之間留五日乃別

送冲卿守高郵

鷄鶩守樊籠鴻鵠游四溟羨君一麾去不負人間名孤
 帆西北風海日東南明回首笑富貴浮雲亦何輕我憶
 童子時綵衣戲五亭離懷重自感墮淚沾長纓

公是集卷九

公是集卷十

宋

劉

敞

撰

五言古詩

聞王十八除檢討

滄海有蓬萊去人初不遠舟車有難到方士曾空返聞
 子騎鯨魚姓名已金簡誰云路幽險但怪波清淺俯窺
 紫貝闕洞視白玉版神仙豈學致變化絕微顯乃知淮
 南藥力可及鷄犬相望雲霧深冥冥白日晚

任城道中

驅車太山下過憩任與樊此地昔建侯邈哉羲皇孫市
朝非一世茂草空平原三十餘萬歲忽如飛鴻奔毀墓
骨已銷但有石槨存縱橫委路隅冥漠游岱魂古今一
丘貉成敗誰復論區區東家翁乃復哀瓊璠牛山顧千
駟涕下何由諉忠義獨不朽庶幾長者言

陳橋別隱直

柔遠在無外飲冰寧顧家旌麾辭北闕原隰生光華水
涸雨亦收勁風卷驚沙送車何其多高蓋垂文綯張侯
平生親情義固所加哀我志慷慨睠我天一涯出宿水
上亭暮談見晨霞百里亦已遠心乎不云遐我自東西
人豈能守蓬麻周爰愧靡及敢不重拜嘉

答江鄰幾到潁州見寄并封示晏公送行

日夕風雪佳相念思乘興忽憶君在遠離憂紛難定入
門對新詩滿眼冰玉瑩因疑君居側恍惚不自勝別來
雖無幾日月稍已迸一葦悲河廣況乃山川迴遠遊殊
風土孤響謬羣聽常恐用原憲夫子歎何病幸傳丞相
篇復見仁者贈懸知愜真賞有以誇歷聘何用慰索居
一朝再三詠

寄深甫兄弟時在潁

回面薄領役終歲無一欣思君阻晤語坐想如古人百
里非遐方書疎絕相聞亦知平生懷未爲疎數分昔君
幸見憐約禮博以文今也知不及矐然已絕塵裏飯更
欲馳漭漭風雪晨高會汝潁間千秋愧荀陳

舟次潁上寄貢甫

我詩持寄君宛在汝水濤君詩欲寄我蒼茫煙浪深寒
水爭赴壑駛流激清音扁舟沂游往寂寞嗟獨尋潁煙
稍塞望淮月初清心恨無知賞同樽酒誰獻斟相思意
不極宛抑訢鳴琴曉燈半明滅抱膝成苦吟

古意三首

相逢偶相識相識竟相離會知別情苦寧作未相知相
見如夢中夢中還相見薄帷鑒明月恍惚仍對面、
主父昔未仕頗爲鄉人輕上書雖晚達稱說何縱橫不
忍脫粟飯甘爲五鼎烹豈不愛厥身徒爲喪其生吾聞
南山翁軒冕不得榮

柳下不違俗獨馳伐國言三黜何嘗憂一問遂慘然世
衰狙詐用賢者防其源孟軻不言利顧有仁義存何乃

百世後功名爲時敦

秋意四首

陰蟲鳴空階危葉墮高樹秋風雖昨日所遇已如故悠
悠歲方晏采采行多露芳香日可閔宛彼蘭與杜

鴻鴈起海濱凌風自翱翔冥冥青雲間縉繳安可望千
里一悲鳴一里一徬徨時變感自深豈伊恨越鄉

鷓鴣信多智出處能自謀非無人間畏而襲人間游微
風動高林梁棟生早秋斂翼從所願落實安得留

翻翻林間藿昔惟桃李華飄飄終焉薄江海無津涯榮
華寄須臾顛顛空泥沙良無凌霜節安得復嘆嗟

雨晴率張生及諸弟到薦福僧居

沈陰天氣昏忽霽景物好牆陰且殘雪池岸已芳草愁
懷無端涯強出慰枯槁白日當青天所至豁如埽山僧
一飯畢鐘鼓不復考庭宇若無人牕軒照丹藻徒行不
知遠適興愜所禱如覺逍遙遊頗堪謝煩惱諸子吾宗
秀張生一經老相顧能不言歡然屢絕倒

初鴈

翩翩南飛鴈契闊萬里道朔雪常逼秋知幾諒宜早敵

兵盛西北弓矢斷飛鳥側翅鋒鏑間悲鳴觸懷抱往時
商山翁自放亦忘老避地吾所師相望戒輕矯

始聞鴈

冬夜何漫漫北風扇淒惻始聞南飛羽稍稍過我側來
賓無乃後恐非歲時忒朔方稽常貢物性隨變易哀音
一何厲路遠霜雪積就陽旣云歸感義靈自默胡爲堂
上士撫劍重歎激

沒蕃士

丁年仕轅門欲食萬里肉敵兵方強梁邊境日局縮是
時十月交轉戰大河曲落日天地昏風塵蔽川陸我師
自憑陵敵騎出深谷路窮矢交墜壯士同僇辱投身致
網罟南向長慟哭忠義安可論功名亦已覆悠悠捐歲
序忽忽抱心曲每生悔爲禍致死倘還福夜渡黃河冰
獨依荒榛宿狐狸鳴我旁虎豹相馳逐脫身僅毫毛夜
動晝必伏肌膚存空骨性命牛鬼錄十月到亭堠問人
識風俗回頭復長望慷慨淚盈目憶昔萬人出今還一
身復可憐同時輩視我猶鴻鵠永棄絕域中幾時脫臣
僕叩門謁主帥長跪向人哭可汗甚雄傑其下亦輯睦

公集卷一
五
努力思長策勿輕用人屬

寄子華內翰時亦宿齋是夕風雨

君居白玉堂我在紅藥署出處豈不同咫尺限相遇風
雨聞雞鳴節物驚歲暮思君正展轉夢中亦知路

過澶州橋有感

河水東赴海還從天上回寧知今日波還復前時來岸
柳亦已黃原田正萋萋念我平生歡悵然使心哀

和江鄰幾雪軒與持國同賦二首

君居近城市每猶厭囂煩積雪成高臥故人來在門埽
除更爽塏談笑寂無喧開牕延寒月拂席置清樽真得
酒中趣安知狐白溫

長安雖大雪車馬無休時窮巷有高士閉門獨何爲朝
烟不黔突彈琴方賦詩逍遙無忤色慷慨多逸辭適有
感同好寄聲贈所思調高當和寡無以答君知

養雞

茅茨一畝寬生理備委曲雞豚自古昔豢養隨世俗鑿
垣安其棲幼長何碌碌旦出四飛散暮還相從宿頗哀
鴻鵠輩飲啄不充腹何事萬里遊羈旅傷局促衣冠相

公身集 卷十
嫵媚庭廡更追逐未悟糞土非豈知稻梁辱物理常有
此人情苦不足安見避世翁頽然臥空谷

乘小舟入朝京門訪安道

南山隱厥清流春光滿上頭懷人不勝意乘興去扁舟靜
吟日光午孤棹正脩脩固當見安道曷若王子猷

送陳竒祕校遊寢丘

世往人物非古今共滔滔聞君寢丘客因憶孫叔敖脫
身田野間功業青雲高憂國不顧家子孫負薪勞苟無
滑稽士亦已埋蓬蒿嗟來千戶封晚受侯王褒賢卿尙
遺忘反慕貪與饕况彼里閭人安能厭糠糟伊昔方斷
蛇許身輕鴻毛陰德尙有報天寧給吾曹努力道路勤
我心良鬱陶

宴得解進士

先是予
爲監試

汝穎紀南國星極麗中州多竒兆兩漢粹氣兼九丘里
巷含古風文章耀前修上恩榮計偕博選充詔求雜沓
會駿骨軒昂出驂騮曰余曹深識有司屬同憂攻玉固
以石妍媿豈云侔登龜但投餌美惡非其儔堂上歌鹿
鳴樽前親獻酬有功幸九錫與祭爲諸侯

送胥元衡殿丞通判湖州

平生笑山濤非隱復非吏今更欲似之顛暝老將至羨
君負清識于世寡所求能從魏闕下徑取江湖游扁舟
駕長風千里破高浪倚檣一清嘯佚氣橫雲上醜碧簪
下酒紅鱗茗溪魚綵衣起爲壽此樂天下無誰不慕軒
冕顧多困朝市人生難自諧祿仕當若此

譏謝十三

利交勢相營義交氣相得千歲若旦暮萬里猶咫尺昔
我相聞聲但嫌未相識今我相同遊又恨莫相益同時
復同道同官又同籍平生重結交然諾亦自惜子爲太
守丞我爲里中客雖復戒疎數不應事形迹

宿九里潭

潭樹老垂葉蔭茲千百尋蛟潛伏遺劍魚躍應鳴琴遠
客何所羨神淵涵淨心

橄欖

本草言橄欖解鯀
鮪及酒毒最效也

吾昔評橄欖不在百果後其材中棟梁其實過橙榛俗
人多未識至美或莫售材以遠見遺實以苦爲詭華堂
娛嘉賓甘脆陳左右此物萬里來真味寧免陋欲觀絕

倫效宜與危事邁江魚肆潛毒頃刻輒僵仆昔酒發狂
醒千日尚沈瞖性命如危絃一絕不可救幸能服刀圭
咄嗟反其舊此亦天下奇能使天者壽豈殊魯連子談
笑解紛鬪功成歸海濱不願千乘富

聞伯庸再安撫涇原

壬午九月鎮戎
喪師復再往

西師又失律將帥各顛覆流血丹川原積屍委山谷咄
嗟仁壽域短天生理促王命有不行國威爲之劬鄙夫
無憂責感慨祗慟哭况聞哀痛詔輟食想頗牧朝廷足
名卿多壘各含辱謀議宜深長瘡痍待湔浴使乎非常

任天子意所屬百萬氣未蘇吾民且局縮賢人勤功名
報國忍勞篤往者博望侯昔時來君叔再三持漢節白
髮走川陸豈不久顛顛事業光簡牘關河據上游郡國
同心腹征繕向五年強宗亦單獨君乘赤輪車一一詢
比屋唐虞升平風凋悵難再沐

鄰幾過門不留戲作

陳平少負郭亦回長者車貧賤雖足羞猶問道何如此
風固宜少未謂今便無所望臺閣賢尙能念古初左轡
塗朱漆長綬要銀魚化我不少留始知心見疎彌年寄

祿仕竟日勞簿書相與同笑言俱幸逃空虛春秋期知
我雅頌誨起予茲意未可忘君宜誦權輿

秋雪

剝候凋羣陽幽陰肆騰涌清霜飛雲初大雪吁不兕續
紛舞鴻鵠細碎翻蠖蠓北風故相資凍雨仍更縱泥塗
絕行道珠璧棄郊壘戢戢九重高兀兀雙玉聳寒光坐
輝映凜氣彌衝擁壯士歌慷慨儒生議刑寵長年昔未
逢噤語空多悚皇天無私尤德惠答虔輦豈伊傷時和
蓋亦遵順動況茲秋方高民麥皆在隴龍蛇蟄既坯烏
獸毛亦薙農夫樂休役天子寬垂拱信此豐年祥爾曹
何必恐

秋雪寄獻臣

三年海水旁卑濕厭歊熱都城幸相從比歲秋逢雪秦
吳乖風土南北異時節惟君歲寒姿一致乃欲別出門
顧道路冰霰埋車轍咫尺阻相過誰當慰寥泬

月夜期江梅兩君不至聞在李二審言家飲

日入更灑埽條然庭檻空酒杯落明月白羽來清風佳
興自不淺幽人無與同徘徊臥林下重露沾蘭叢

城樓

新晴疆人意步上西城樓雲煙開井邑締繡錯田疇離
離麥就熟翳翳桑尚柔懷歸感初服覽物悵淹留

子高作司諫見舉自代

智短多不堪穴官略自保念非撥煩用猶覲趙魏老故
人紫微微仙自致青雲早回首記平昔露章慰枯槁先容
輪困木進取萬里道妄意巉巖石庶幾千金寶過聽為
君羞貪名怯陰討人亦謂我何自笑方絕倒

聞子飛作諫官寄隱直

玉以三獻珍金以百鍊精錢侯困躋時詎免時俗輕感
激生憤勇辛勤就功名居然取高第自此凌諸生諫官
近冕旒地望臨公卿報國須薦賢致君在舉能蕭朱尚
結綬張杜猶提衡小雅紀伐木微禽識同聲此風久已
無賢者當肯行念子早治裝復令世人驚

賀隱直

錢子飛言之中丞
中丞奏辟主簿

三年守一官五年調一職選門萬餘人過半頭髮白賢
愚必待次先後各循格相與為波流其誰辨白黑子今
特招起方與塵土隔翰林誠知人錢子飛中丞亦好德古

來御史屬自與二府敵于今任雖卑其實名不易必將
寄紀綱豈獨親簿籍鴻鵠須遠飛騏驎無近迹往矣勿
自疑天方佑正直

賀王純臣

昔者巖穴客多隨辟書起榮名耀山澤高爵下閭里此
道不復振此時竟已矣不圖廷中賢有意及之子十年
困鄉書三黜竟不仕一朝邁知音籍籍到天耳窮通諒
有數自古多若此年華猶未晚富良方自治伐木情所
深彈冠坐增喜請歌反招隱以激南州士

詠庭檜贈深甫

自吾臥家巷幽獨謝鄰里顧憐庭中檜常以比君子春
秋色不變朝夕影雙峙誰言冰霰繁稍亂蒹葭毀始知
歲寒甚慘慘不自喜悵然對之歎爾復那至此陳蔡稱
愠見由也德可鄙天損吾能違放歌有焱氏

檜花

百花乘春輝紅白相嫵媚暫開已半落過眼如夢寐繁
奢能幾時寂寞都埽地兒童惜徘徊婦女瞻歔歔中庭
兩檜樹百尺浮雲際芳意不玩俗秀色亦自喜綠煙凝

參差金粟點細碎霏霏墮疎香裊裊隔清吹足明後凋
節不與衆草類忽思折瑤花自放天宇外

初秋病中作五言呈君錫待制介夫學士

蹇淺聞道噓蟬自焚和負茲歲陰改閉閣秋風過濃
露變園草號蟬翳庭柯覽時悵頽暮顧影驚婆娑平生
江湖尚薄遊不願多奚爲役外物況乃淹舊疴徂西識
芄野采菽聆悲歌今昔容不同情感殆靡他勞生共逆
旅馳景均騰波行矣自免歸息陰安薛蘿

送王子直還斥溝

薄薄雲蔽日淒淒寒中人飛飛燕歸蟄漠漠鴈來賓送
子獨無友悲秋空病身登山復臨水便覺二毛新

初卜潁州城西新居

羈鳥能擇木游魚知赴淵飛沈豈異意行止私自憐玩
世本無術辟人庸得賢卜居幸樂國負郭依良田心與
地俱遠我徒共熙然生涯亦何有聊以忘吾年

早行

虛舟卻煩暑初旦更清和塵襟暫軒豁幽興亦滋多黃
鳥嘒深樹良魚躍層波岸花間紅紫村叟雜笑歌稍忘

溯洄力未悟歲時過側肩市朝客偃蹇奈予何

晴日後園

羣鳥飛朝日鳴鶴響晴空宿雪乍消釋滯陰反冲融幽
居亦可愛老圃願與同負暄空林下游目故城東世事
見流水歲華指飛蓬酣歌用自適貧賤何必終

公是集卷十

公是集卷十一

宋 劉 敞 撰

五言古詩

新作石林亭

朝廷入忘返山林往不還念無高世姿聊處可否間築
基傲崔嵬鞭石輕險艱羣玉相磊落萬峰正孱顏種樹
亦蒼蒼激流復潺潺澗渚歛在眼岷閬若可攀自我嬰
世網邇來鬚毛斑邱壑成弱喪簿書常自環及爾滅聞
見曠如遠塵寰豈敢同避世庶幾善閉關子牟困懷魏

公集 卷十一
謝傅悲徂山茲焉可遺老詎厭終歲閒

樊口

回舟武昌郭暫往樊水上樊水何清冷樊山亦孤壯壽
藤驗百歲喬木過十丈絕俗殊崎嶇攀緣幸可傍林端
見漁舍戶牖相背向雞犬鳴雲中神仙豈殊狀昔聞元
次山于焉寄荒浪鄰里俱已非陵谷平得喪茅茨固微
物蕪滅不可訪向乏數卷書終隨衆人葬清時易直道
未俗擯高尚陳迹成渺茫孤吟屢惆悵

宿州道中逢聖俞入京

翩翩河中船一西復一東相逢且不留相別何時逢黃
鵠安稻梁有時顧池籠一爲滄浪去不復思樊中哀君
蒼髮白擾擾悲途窮努力千萬乘寄聲謝醉翁

謝學士赴闕還京師

謝之先德
嘗典記注

公提史臣筆記注天子側日成唐虞風噩噩在典策家
聲繼純粹論著多切直周南未成書流涕嘗感激忽從
東溟飛上拱宸斗極清淮淨無波歸馬閑且奕帝宮青
冥間白日升曉色儒人相慶語文道宜久職公歸演綸
誥制度期能覲

和甫自京師至

過事與日多歡憂兩如夢安知盈樽酒此國今宵共寸
心不如昔感遇每易動孤笑破羣愁強顏不爲用天河
轉屋角缺月照樑棟燼落屢續紛良時亦倥傯驪駒晨
在門十里起相送暫醉醒不遲舊愁來更重

得鄰幾書

君乘使者車我爲列郡守地理秦與越天文井兼斗夢
寐且不通言笑安得同忽傳咫尺書遠愧西南風衰老
容貌遷憂患志氣落聞君自紛如我亦不如昨捨書計
離別忽忽三四年一日成九秋此語猶信然天地大逆
旅外物不可必出處多舛馳相逢定何日尚禽晚且游
沮溺長耦耕此意雖未合且當勤寄聲

答李谷同年書

歸客江南來迢迢數千里故人遺我書細字三四紙上
言平生懷伐木義所倚下道相知心結綬方獨喜寧知
淮陽翁棄外甘臥理不預朝廷議何由發吾子

楊彥文過

病起時節改遶池飛脊令賓交絕來往門戶常晝局朔

公集 卷二 三
風裊聞闔凍雨翻滄溟泥塗墊后土氣象昏圓靈局促
久增欷據梧目思瞑窅然顧環堵嗒若亡我形夫子亦
何事羈旅復伶仃孔懷在接浙過我不遑寧歲晏絕晤
語誰當慰長醒

晚過深甫

忽忽衡門下幾希田舍翁有時寄一笑目送南飛鴻今
旦天正佳草樹搖春容忽驚枝上花飄落隨西風偶然
幽興展思樂古人同塵埃比殊深杖屨亦可通誰謂車
馬多澹如初不逢

讀鄰幾泰山十二詩

宿心慕鄒魯寤寐泰山杪慷慨念遐觀滯留想輕矯人
寰何鼎鼎羣動困擾擾安知有神靈獨立萬物表圓天
似車蓋滄海稱池沼丹梯無留迹絕壑通過鳥古今更
廢興萬事論莽眇七十二家舊永與耳目宵羨君能自
力窮覽謝煩湫超然昔賢趣處覺茲世少吐詩狀奇麗
思與雲縹緲忽如按圖畫所向得了了悠哉仲尼意信
彼天下小

休復謹次韻和呈垂覽拙詩之作

朝躋天門路暮宿白雲杪超然六合外如翼鸞鳳矯
運眸極遐曠收念息奔擾盤盤上絕頂獨立顯氣表
天壁涌神泉玉龜泳靈沼凌奧無螿蟲集灌盡百鳥
勝境窮賞踐陳迹嗟緬眇接遞終焉託真仙事殊宵
雲露相飄颻塵途忘湫湫躡屐游已屢操觚才患少
思軋幾沈伏神馳空縹緲謝客興不淺尚子計未了
何時出塵籠重看衆山小

送從兄

東門楊柳深下有還鄉路之子千里行春風三月暮旅
心常草草飄忽不可駐居者空徘徊行者亦反顧丈夫
方貧賤四海無所遇不如轍中魚猶以沫相煦悠悠大
江水日夕自東注何當激風雷慰爾飢渴慕

山光寺送獻臣

嘉集常苦難送歸豈辭遠檣舟故相逐攜手行自挽古
寺何崔嵬深林象巖巘幽尋取乘興造適非素選寒泉
水深池衰草被長坂歲窮景蕭條僧老意繾綣勝賞竟
誰同相知幸非晚離懷自無極日暮仍忘返

燕譽堂飲別朱著作

公長集 卷二 五
歲晚節物變會難羈旅悲疎燈照四座殘菊醉空卮歌
闕風雨起舞餘冠佩敬天明念陳迹忽忽叢予思

以石爲玉

梧臺有沈璞由來非一春時無司南駕自比連城珍
如崑丘叟相與笑緇磷勿以名夸世而將暗投人

夜分東牕見月

逾望月彌晚宵分在東牕隨風漏疎隙散彩奪寒釭
留翫坐忘寐啓書對空缸惜哉皆陳迹誰爲足經邦

酬某

讀書與博籊亡羊信多岐何以消煩憂謝墅觀弈基
寓物取歡適吾道有張弛誰能長刺促屈首就鞅羈
陳遵嗜盃酒伯松見謂嗤袁絲沈里閭劇孟相追隨
君方總府事吏牘正紛披走見固所願清閒在他時

酬林國華先輩

昔吾臨汝南休騎思俊賢此邦號多士今世猶依然
奉詔選計偕至者皆比肩子時避逃我常獨懷悁悁
豈我非其人長鯨隘蹄泉將由求之失黃鵠去不還
察廉未塞責負課終彌年解印歸臥家百憂正纏緜
聞子來在

公是集 卷二
門華裾燦雲烟手攜一卷書金碧紛蟬聯慰我平生懷
意好何深堅始知向難進非以相棄捐鄉評讓父兄觀
國氣無前翰飛果自致大笑諸老先毫末爲豫章衆流
成深淵物常積于久念子亦勉旃令名百世榮文學貴
本元愛至相期深愧無長者言

夜雨

盛陽爍微陰五月氣蘊隆天地爲大爐萬物皆廢銅俯
欲濯江漢仰思凌蒼穹縮身投蝸角救暘號天公天亦
哀人謀玄雲送雷風須臾雨如瀉一掃萬里空有似脫
炮烙又如逃祖龍大哉造化力因見王霸功

登呂屯田清暑亭

日永雖徂暑虛堂自清幽主人意未展改席茲城樓嘉
樹遠近合清川縱橫流好風萬里至浩蕩開容愁長嘯
欲飛動勞生局遠遊眇然不自慙目極孤雲浮

許州西湖

羈旅懷江湖氛埃願臯壤及茲已俱適初意恨獨往樓
觀湧參差軒檻豁高爽清光見毛髮衆影兼俯仰昔者
廊廟客于茲濯塵網疏源不憚遠勝事日以廣美矣流

公是集 卷十一
水意當爲知音賞

晚過西湖

日暮無與適緩帶此逍遙湖光悅我心步上西城橋遠
烟被林莽樓閣隱岩堯歸鳥先後飛夕風正飄飄悵然
念遠渚與盡復行謠

睡起

日午更稍休池上逍遙眠水木澹相映庭戶清無喧時
有山中禽來鳴高樹巔微風拂襪過會意成翛然有生
滯形役萬物安靜便愧無淮陽績高臥亦終年

奉和府公新作益山激水若泉見招十二韻

誰謂山水秀忽登君子堂乃知仁智樂不與冠蓋妨濃
靄萬疊碧懸流百尋長列峯映落落遶溜含蒼蒼氣爽
變衡霍聲幽激瀟湘意真景自遠趣逸累已忘鳴玉無
時續翠屏終日張賞音得虛寂寓興成軒昂夙昔慕丘
壑邇來倦簪裳欣符洗耳願遽有尋源狂縱目寄歷覽
挾琴寫鏗鏘但疑主人厭應接殊未央

遊五嶽觀寄鄰幾聖俞

五嶽神仙境可聞不可攀安知采真遊近在都城間樓

觀橫飛雲虎豹司重關車馬自茲止始覺非人寰層波
漲滄溟參差出三山金銀麗宮闕日月相循環東來復
幾時花草紛斑斑長楊垂輕絲若委千髻鬟氛埃無由
及魚鳥相與閒造適不自知忽如脫沈痾那得窺壺中
逍遙去塵闌主人白瑤盃勸客流霞殷此中可遣老豈
獨聊忘還嗟嗟二三子世路迷險艱流光競奔走俯仰
移朱顏誰肯委俗紛相從解朝班濯君冠與纓春谷水
潺潺

谿上避暑

滴瀝松下雨清微萍際風欣然此時賞我與斯人同倦
鳥墮水上游魚翔鑑中不言閱羣動未覺幽興窮

東館避暑

虛館含微風高梧散層陰逍遙敞戶牖曠蕩披煩襟雲
光壓孤城火氣連千岑四海俱探湯獨清亦何心願傾
西湖水起就三日霖落落抱寸誠此志誰能任

得隱直書

庭柯結浮陰深竹聽鳴鴉晚涼愛軒宇默念得佳客適
有南逝鳥墮君一封帛眷予方幽獨慰我正相憶洛中

輕肥地子復顛顛色富貴若可求吾從執鞭役

隱直近詣闕獻書報聞

炎暉若探湯周道行倭遲之子忍重跼斯人方病瘵上
書蒼龍闕移副鼎足司卓躒動羣聽謂言卽張弛虞卿
萬乘相子房帝王師古事可髣髴世塗實參差天閭虎
豹深棄我忽若遺卻走國西門素衣化爲緇行行屢回
首未忍從此辭賢者愛其君肯如悻悻爲吾聞先達語
進退自有時版築不爲辱飯牛豈嫌遲男兒建功名或
與老定期努力梁甫吟古人不予欺

將入京得淮南王工部書及遣壽州官船以來五

言寄之

生理厭漂蕩三年若棲苴春深感松柏涕流望京華誰
言數舍近局滯成天涯鬢色新一毛悵然空復嗟明侯
平生意雖遠不云遐叩君金玉音眷我需于沙旭日明
清川扁舟問貧家雖非方外遊此亦海上槎盡日庇短
篷不慙負舍蝸愧君濟川才引領隔雲霞何由一乘輿
世界紛如麻

答君章譽兩兒見寄

窺鏡見二毛自憐憂患餘豈惟壯心盡方與功名疎終
歲不捉筆歷時長束書顧常念絕學正復傷離居忽忽
莫自聊悠悠空歲除過壯而無聞我其衆人歟故人來
江南丹靛映隼旟尙持平生意期我相得初殷勤作新
詩爛漫聯瓊琚溢美及兒曹俾來問起予雖知非其實
但愧情相於矧乃筆力雄駸駸逼曹徐一讀必三歎何
由望儲胥故人昔流落襟抱久不攄乃者始再遷通直
承明廬蒼龍脫鞴綈快馬從輕車神至氣自豪心廣體
亦舒淵源未易測變化天池魚甯獨揚子雲其工似相
如苟能哀顛顛有以慰空虛月寄三四幅窮愁直見祛

答徐無逸秀才寄示新文

金華神仙境山川天下無之子復清發自與常人殊問
學當世賢不違智如愚歸來守桑梓寂寞安故廬此風
足礪俗有以光吾儒如何臥空谷自樂詩與書我辱廷
中臣一麾寄江湖薦賢力不足相望空長吁

對酒憶諸子

以酒自足飲胡爲坐無歡念我意中人四顧用長歎平
生交遊少而復聚會難萬古膠漆姿各在天一端用兵

輕文儒諸子俱小官物生繫所逢窮達何足言但恨適
有酒共醉乃無緣

出塞曲三首

桓桓良家子趨趨羽林兒恩讐久未報感激氣拂霓無
用丈二組不須一丸泥獨身斬敵首手攬封侯圭
丈夫不懼死所懼潛鬪茸出身義許國桀石賈餘勇豈
無親戚憐決去甘登隴人生在奮發將相寧有種
茫茫郊塞遠木落原野空鼓聲濕前雨笳吹悲後風山
州行無極敵窟未可窮生當取榮名死當爲鬼雄

移葦

8

蕭蕭江上葦。老叢已深悠悠。文王死常懼牛羊侵遷
根。潢汗池慰我江湖心。清風日夕過白鷺。時見臨疎響
拂琴瑟。綠華曠衣襟。處卑節不改。習靜情足欽。炎輝已
堪愛。秋景坐可尋。願及鱗明堂。甘心辭故林。

欲于舊州石橋作偶渚臺以備遊覽先爲五言

河決鉅野溢。此時吾山平。百川會兩澤。千里圍孤城。桑
野就蕪漫。石橋尚崢嶸。往往有白鶴。飛來羣悲鳴。我欲
覽風土。因之省民耕。誰能同我樂。誰肯從我行。楚人哀

江南倚沼而畦瀛臨高誦斯語正復傷人情當築十丈
 臺偶渚為之名上可容宴豆下堪列旆旌棹歌出中流
 簫鼓會前楹浮雲來東山落日隱北溟此樂或難忘請
 公為我評

章華臺

楚子志方盛築臺臨章華度高累百尋計產逾萬家參
 差蔽日月煥爛生烟霞侍酒皆列侯佐歡盡名娃嬉遊
 未云樂荆棘紛已芽奈何竭民力用此為盜誇蔓草匿
 頽基長風卷飛沙廢興若糾纏故老猶咨嗟

曲水臺

杖履不能遠逍遙池上林微風起眾響炎日隔繁陰斐
 疊激流泉間關語鳴禽放懷在離人寄賞欣會心既謝
 朝市喧亦忘山谷深雖知非吾室猶以開煩襟羽觴泛
 中流中流暖景偶作中流東布軍期不來白鷗自飛起

垂楊欲吐花芳草遍抽芽低風動簾幕細雨濕堤沙暖
 景蕩愁思一城千萬家

冬雨偶作

江上朝來雨城中起寒色淒淒濕塵土漠漠蔽空碧築

此下尚有一首
似別為一首

公集 卷十一 三
場看已晚及物悵無益苞著怨下泉客子長太息

豫章儒者

豫章有儒者讀書三十年但識上古風不知時俗遷一
聞西戎叛有意摧羣頑詣闕上封章臣知用兵權不在
勞士卒不須役戈鋌要先正其本本正末自安臣觀朝
廷中或有可廢員臣觀草澤中或有可用賢國家既失
此奸吏隨矯虔吏奸萬事隳外患隨因緣所以子玉存
文公積愁顏所以汲黯亡淮南爲無難天子覽表歎當
朝常拳拳迴頭謂羣公可付史館編可使縻好爵以補

風化源豈知貴臣息投爾南海孺不得面指陳胸襟曷
由宣走卒驅使行行酌貪泉名與囚隸俱位乃胥校
聯九重竟不知猶謂列王官奈何樂堯舜乃是取危顛
誰云遇明主未免遭棄捐遂令天下士辭舌戒勿言寧
有死壑中安有議君前浮雲蔽白日自古同所歎豈爲
此生悲我歌願臚傳

賀尹學士辟經略府

年來方苦兵邊氛蕩區夏西陲亭障盡人骨蔽荒野漢
家飛將多程李相上下試問誰董之王朝大司馬分廷

授斧鉞號令從此把主憂臣當辱開府納儒雅堂堂蒙
山誓乃是謫仙者謀畫當代無胸襟一朝寫誠知鑠鉛
鑛不合煩大冶要使借前籌非公諒誰假鷹飢肯擇肉
驥逸始流赭由來抱軒昂可得不脫洒昨聞負芻粟中
戶困楚櫃此事已大急哀哉動鰥寡兵家尚神速世務
忌苟且願公更深謀卻敵如破瓦鱷鯢埽封境疲瘵沐
純嘏豈令曾仲尼獨贊王孫賈

鷓鴣巾

余率意作之以便當暑其形制如燕也

遠思意而子因作鷓鴣巾處世本遺物全生龜近人輕

涼便肌髮瀟灑外埃塵山林有獨往此亦陶唐民

望洞庭

洞庭七百里浩蕩敵溟渤雲夢開其胸巴陵東喚舌東
流匯羣川盛漲五六月飄颻浮乾坤倚蓋低兀艤吾行
寰海間未見此水闊峽流下衣帶島嶼盡毫末高秋卷
氛翳兩涯浴日月何得徑寸珠晦明互出沒蒼茫蛟龍
宅溷雜魚鼈窟太古到于今沈潛孰分別風帆引北極
波浪限百越國絕南顧憂獻琛各通達山川非一險此
實輔明哲俯笑三苗愚竟為獨夫滅遠遊世俗隘偶此

耳目豁浙瀝臨清風滂沱濯炎熱蕭蕭霜林暮藹藹芳
草歇壯觀激我懷當歌意復咽寂寥軒轅樂萬古逸響
絕慘淡虞帝魂九疑莽嶒嶸况聞屈賈輩各賜楚漢珉
至德無復還後王寢衰缺滔滔更南征鬱鬱抱怛怛太
湖雖云深未救懷古渴

公是集卷十二